


Ruben Mansur a papia idioma cla na Spantenbier di La Cabana

Mi ta privilegia!



ORANJESTAD(AAN)--

"Mi ta enberdad privilegia. Privilegia di a nace na Aruba. Privilegia di a worde cria na Aruba door di un mama y tata excepcional. Privilegia di a worde educa na Aruba cu su valorman di gentileza y bondad. Privilegia di a casa na Aruba y di por a cria mi yiunan y nietonan na Aruba. Y privilegia di a nace y biba na un isla cu Dios a bendiciona."

Cu e palabranan aki Ruben Mansur a termina su discurso na ocasion di Spantenbier Diabier na La Cabana. Su palabranan a causa hopi emocion y tabata marca e ambiente cu tabata reina na e sitio, caminda un hotel, diseña y realiza pa un familia Arubano, a yega su punto mas alto.

E discurso di Ruben Mansur tabata liga na un realidad, cu a worde sinti na e momentonan. El a splica con tempo cu hunto cu algun ruman, e tabata papia di e proyecto y tabata pone ariba papel, situacion na Aruba no tabata di gaba.

Pero nan a dicidi di sigui dilanti, como cu nan a kere, ta kere y lo sigui kere den e futuro

Su tata a yega Aruba 90 aña pasa den scochi di su abuelo, a bordo di un barco di bela di Paraguana. Nan tabata e familia di mas humilde di e tempo. Nan a laga un herencia pa nan descendientenan: con dificil cu e situacion ta, si bo traha duro y dedica bo mes na trabao y cu fe den Dios y creencia firme den bo patria, lo bo prospera. Diabierna Ruben Mansur a trece historia di su familia dilanti, ora na forma emocionante el a splica pakico e ta privilegia!

di Aruba. E filosofia di bida y empresa, cu nan a hereda di nan mayornan a duna nan mas entusiasmo y confianza den nan decision pa ehecuta e proyecto.

Ruben Mansur a muestra cu tempo cu su familia a yega Aruba, casi noventa aña pasa, tampoco no por a papia di un Aruba di mucho abundancia y oportunidad. Al contrario, dia cu su abuelo a yega Aruba den un barco di bela for di Paraguana, cu e tata di Ruben Mansur ariba su scochi, por bisa cu nan tabata e familia mas humilde di e tempo, ora tabata tin otro familianan grandi di promenencia.

El a muestra cu e tempo ey Aruba tabata pasa den momentonan dificil. Un tempo asina dificil, cu hopi mester a bandona e isla y den exterior busca un entrada pa nan familia. Cu hopi

trabao y sacrificio y cu fe den Dios, Aruba y su habitantenan a progresa te cu awe Aruba ta un isla den franco progreso y desaroyo.

Ruben Mansur a muestra cu filosofia di su mayornan a guia nan y cu e filosofia aki a encera cu aunke con dificil e situacion ta, si bo traha duro y dedica bo mes na bo trabao y cu fe den Dios y creencia firme den bo pais natal, bo lo logra prospera den bida.

Acopla na esaki el a agrega e pensamiento di e tercer generacion, cu ta un obligacion moral y di concenshi pa sigui inverti den bo pais, ora y caminda cu bo por. Esaki ta e lema di familia Mansur awe.

Ruben Mansur a recorda cu duele cu su tata no tabata presente pa e mira e progreso den e proyecto cu tanto el a acon-

secha y duna guia ariba. Tampoco e tey pa weita e continuo progreso di tur e proyectonan, cu el a inicia pa beneficio di e familia pero tambe di e pais Aruba. E mes amor, entusiasmo, consehonan y apoyo awe e familia ta sigui haya di e mama, cu tabata presente.

Perdida di Don Elias Mansur a significa pa familia Mansur perdida sensible di e principal fuente di inspiracion, di guia y di consehonan paternal. Pero nan ta grato na Dios cu nan mama tasigui cu nan y ta para banda di nan cu tur su amor y apoyo.

Mustrando pakico e ta sinti su mes privilegia, y causando emocion enorme cerca tur esnan presente, Ruben Mansur a yama su señora mama dilanti pa asina ehecuta e acto pa conmemora e hecho cu La Cabana a yega su punto di mas alto.

Accidente basta serio na aeropuerto



ORANJESTAD(AAN) -- Ayera mas o menos 5.25 or di mainta, un accidente basta serio a tuma lugar na e luznan di trafico na aeropuerto.

Tabata trata aki di un auto A-21589 cu a dal contra e truck TR 89.

Ta asina cu debi na e impacto

e chofer a resulta herida y cu ambulance el a ser transporta pa hospital. Na e sitio di accidente tabata ser papia cu pasamento den luz cora a causa e accidente. For di Polis no por a haya informacion concreto ya cu e rapport di Departamento di Trafico no tabata cla.

